

本書原稿承國立故宮博物院惠借

謹致謝意

續青田縣志小序

昔褚少孫續史記班昭續漢書劉煦續唐書因舊續增自古有之余自癸巳冬蒞青田任邑紳韓君錫胙余舊友也丙申夏韓君觀察蘓松寄書

來青囑余重修志乘余以不
敏辭秋九月

府憲王公蒞任命處屬十縣
各用續志抄本送府勒爲一
帙事不煩民不擾甚善政也
丁酉春余蒐輯成卷攜赴郡

城適有吾鄉李君若玠者出
仕粵東被議來浙余出稿相
商李君曰續志之法政事人
物藝文專叙近年事並查前
志缺畧者補之星野沿革山
水等類舊志荒畧不妨核辨

訂正風俗一門政治所關尤
宜詳考脩載勿沿志家陋習
余以爲然進謁

府憲王公見其所藏天下各
府輿圖壤地相接犬牙相錯
又蒙

府憲手指口授披覽之下頓
覺心目開爽雖足不出戶庭
而天下名山巨川之向背通
都大邑之壯麗不啻現之眉
睫指諸掌上古人之所稱卧
遊者此也我

皇上神武遠揚疆宇日拓新修

一統志煌煌鉅觀其圖象必
更有豁人心目者因思自天
下而各省各府各縣廣狹雖
殊理勢則一故於舊志總圖
之外更增十八部分圖使其

相鄰相接遠近了然俾宰斯
土者身不出衙署而於百姓
之輸將差役之往來有以稽
其勤惰而督其緩急亦居官
者之一助也爰繕寫成冊恭
呈

府憲核定而邑紳董永發陳
開基等因付梓人焉是爲序

省

龍飛乾隆四十二年丁酉歲長
至之吉

侍授文林郎浙江處州府青田

縣知縣丁酉科浙闈同考官
山左吳楚椿書於青田官舍



續青田縣志目錄

第一卷

闔邑全局

第二卷

各都分局

第三卷

政事

第四卷

風俗

第五卷

人部

第六卷

文部

凡例

一青邑原志迄今不過五十載通體重修爲費甚鉅辦理亦甚竭蹶昔劉煦續唐書肅代以前皆仍其舊而以後百餘年之事附於各卷末余倣其例專叙雍正七年以後事其舊志之字畫殘缺者另爲刻補與新修並存故曰續補云爾

一旣存原志全部則續志僅分六門已足一曰闔邑全局二曰各都分局三曰政事四曰風俗五曰人部六曰文部閱者同原志互參則全脩矣

一原志中有宜辨正者有宜增補者皆爲重叙始末以昭傳信要皆關係緊要事件至於古蹟坊表人物藝文等類原志所載者槩不重錄

一凡品題人物蓋棺論定故現在者從無立傳之例士夫如此節婦亦然守節以三十歲前爲合例完節以六十歲後爲合例然有姑媳同守者或姑長而媳幼嫡妾同守者或嫡長而妾幼再或其人現存年已望六者皆可量予採錄亦善善從長之義也外此者不得濫入

一藝文一項或傳記序文詩歌詞賦之類必其有關志
乘者採而輯之以示傳信而其人之博雅亦借以傳
若尋常酬應贈答咏物遣懷等作槩不敢濫入蓋志
原以昭一邑之信史並非爲人刻詩文集也識者諒
之

一記傳之作取其徵實而已苟能徵實文之工拙猶後
也往見修志之家取前人之文而改竄之間有高出
前人者亦竟有不及前人者適形其妄耳是編藝文
多係舊本一字一句余亦悉仍其舊

一是編定稿出自余手稿成後發交邑紳一切鳩工付梓計值經費之事余概置不問其以簿書案件責有專屬似此瑣屑無暇縈心也